

芮城縣續志卷四

藝文上

大唐宣威將軍右武衛中郎將隴西董君墓誌銘

并序

公諱昭字夏慶隴西狄道人也先葉從宦徙居陝西靈寶焉祖德布於方策門風傳乎奕代狐稱良史永彰孝行安于啟於趙祚仲舒光於漢才人物衣冠可畧言矣曾祖穎府君大父操府君列考難府君皆高尚其志淑慎其身韞櫝藏諸不求善價良弓必復其大後昆公卽府君之元子也傑出高標閒生特達幼而才敏鳳雛有

五色之姿長而心遐鷹鷂揚萬里之望時屬蠻夷猾夏慮軫九重公則魏絳和戎功多五利有詔特拜慈州司馬朝散大夫充大倉出納使青雲自致朱紱斯皇雖題輿外臺而楚材晉用轉隰州刺史餘并如故位因能進政以清聞尋除秦州司馬充隴右軍器使又陟長史使仍舊應天地之洪鑪鑄劍戟爲農器利有轉宣軍其繫賴時天水地震陵遷爲谷城復於隍公謀去故絳制造新邑不愆於素用追我凶微君則人其魚乎時議知政有經矣旣而遣宕州刺史錄有功褒有德也安人阜俗則黃霸徒言名遂功成乃祁奚請老震旒順其至懇解

印返於初服與相國牛公有管鮑之分欽服厥義常以
兄事公公必告善道投膠契於三益莫附權勢挂冠追
於二疏北面辭闕而不留東歸拂衣以遐逝長鄉入郡
駟馬生風買臣還鄉錦衣照地公暮齒益辯所至必聞
復徵辟右武衛中郎將仍充太倉使潘岳偉才直於散
騎之省汲黯能政利往海陵之倉公遺愛尙存舊貫未
改在脂膏之地惟德潤身當嫌疑之衝哀多益寡君子
以爲難矣公以道濟時處進知退君命至則不矯抗辭
耄年侵則不苟縻祿復請致仕再懸舊車子惠琳和政
郡別駕遺榮展驥返哺瞻烏令伯陳情叅乎就養寒林

抽笋正奉於庭闈靜樹驚風忽摧於梁木以天寶五載
九月十八日寢疾薨於鎬京城西甘泉里之私第春秋
八十二崑山之玉與石俱焚龍門之桐梢雲半死朝廷
聞而傷慟者豈勝言哉夫人南陽郡君張氏金鈎表祚
石窳旌賢柔順貞明宴息禪慧蓮華照水豈方清淨之
心薤露晞陽將生極樂之界以開元二十三載二月四
日跌坐歸真於同谷郡之別業春秋七十二開元二十
七載十月十四日歸柩故鄉以形建塔天寶六載二月
十四日以公之喪到自秦會葬於中條之南原禮也前
臨河澍水閱成川却背山陽舟遷去壑龍泉之劍雄雌

始異於飛沉馬鬣之墳佳城竟歸於同穴嗣子惠琬咸
安郡良山縣令次子惠琳等哀苦茹荼痛思吹棘號天
泣血申諭道之無從刻石幽泉庶立言而不朽

銘曰

霸趙開國神降安于炎漢啟士才生仲舒象賢必復一
秩題輿五遷杖節二請懸車高門駟馬照乘雙珠諭道
叅養過庭鯉趨散金正樂埋玉何辜哀哀內則淑德敷
聞鳳凰琴瑟桂郁蘭芬溘然大暮薨我小君一朝同穴
千歲孤墳河山帶礪不朽斯文

劾貪橫宦官疏

明王紀

芮城縣續志

卷四

藝文上

三

題爲奸惡宦官內外合謀貪橫百出荼毒小民謾罵撫
臣法紀陵夷殆盡懇乞

皇上大奮乾斷特遣官校拏解以彰國法事恭遇福王之國
道經臣屬_臣數月以來殫精料理一切夫馬供應之屬
旣欲惜民力又欲光大典斟酌損益臣心幾嘔臣力已
竭矣自謂可幸無罪孰意有同惡相濟欺誑藩王貪橫
無忌如樊用李朝雲其人者哉按用輩本一市井無賴
甘心自腐出之蠶室入之紫禁不過掃除之厮役耳一
遇差遣如虎附翼飛而食人蓋其天性然也方其出春
明而南下也妄意一抵天津可大飽其所欲及至而臣

約束頗嚴裁損較多心殊快快四月初三日卽移一手
本凡宦官下程心紅紙劄門厨快皂魚肉蔬菓之類無
所不索臣以爲膳品等項已折二千餘金小民骨髓已
竭又安可爲此無名之誅求也臣極力拒之而恨端已
萌矣越二日樊用輩面對臣言奉福王令旨除勘合火
牌之外另添討廩給三十八分節外生枝誅求無厭臣
於衆中昌言排之不少假借未幾又差蒼頭二人持帖
來討矯令旨如前臣卽大聲曰此等舉動卽係

聖旨亦當執奏況屬假捏令旨孰敢奉命持之益堅而其恨
遂深入肺腑矣鼠輩橫索少拂深怨積怒虎視眈眈未

嘗一日忘臣也迨四月初八日薄暮臣繫舟交河泊頭
鎮忽聞兩岸哭聲振野赤身泣訴者紛紛詰之乃官字
二百四十六號拽船之羣夫也緣押船內官李朝雲將
夫孫莽等每名索錢數十文一不遂意則拶夾木棍竹
板合併毒加體無完膚孫莽尤其最傷重者業已繫鎖
船頭兩日不給飲食命在須臾矣臣心憐之急差人曉
諭釋放不慮竟觸朝雲之怒乘醉大罵直上臣船去而
復來當斯時也宦官使酒行兇橫口訾詆幾無天日國
家二百餘年紀綱法度一朝掃地盡矣臣以投鼠之忌
計無所出馳赴啟王兵部左侍郎魏養蒙錦衣衛指揮

梅國林按臣孫居相深爲驚詫亦相繼啟王謂必鎖拏正法刑餘小醜或少知憚詎期朝雲之狂逞正樊用之嗾使亦羣宦官所擲揄而竊笑者也一聞王拏不勝狐兔之悲羣姦聚首密謀捏情誑王不曰墩鎖窮夫飛刑疊加嚇詐金錢也而曰夫少曰相嚷曰不知撫臣姓名將朝雲咆哮凌辱之兇狀一筆盡抹黑白任意雌黃信口藉叢煬竈弄王於掌股之上以致朝雲得及於寬政臣惟有仰天長吁士大夫人人喪氣而宦官愈揚揚得意矣次日臣等各具本備陳其事王方悟前爲用輩所愚也將朝雲重責三十未行傳示今覽先生每啟本情

由知彼可惡姑念途中故從輕處到府另行重治還着承奉司溫諭先生不必介意特諭知之至晚先遣近侍徐進安慰臣次早復遣徐進引朝雲至臣船認錯臣以非體辭不敢見然而賢王虛懷折節之風臣感激於死矣夫宦官刀鋸之餘人面獸心得其甘言不足喜得其惡言不足怒況朝雲黃口豎子醉夢之言何足深較臣今日所爲曉曉請劍者豈不知朝雲爲王之弄臣言之傷王之心哉正惟其爲王之弄臣也敢與樊用輩表裏爲奸一唱百和無所不至下吸窮民之膏血上損賢王之令名而實不知也臣若隱忍不言是愛王不以德而

重有負於 皇王之任使矣臣有死不爲也請盡言
無諱可乎勘得承奉樊用近侍李朝雲輩人道已絕良
心盡死其貪婪狠毒之惡蹟罄竹難書姑舉而大畧言
之闕數以上數十欵被害者人人有口過送者處處有
人道府揭帖厯厯有據何物宦豎備憑城之勢肆包天
之膽始猶嚇詐民財也尋且草菅民命矣始猶凌虐百
姓也尋且弔打驛丞矣始猶折辱卑官也尋且飛騎執
旗以辱郡守矣始猶虛聲示威也尋且鎖御史之公差
而大張兇焰矣至於乘醉攘臂直上臣船且號且罵若
顛若狂暴橫無禮極矣可謂有國法乎尤可恨者動輒

假捏福王令旨俄而添折夫一千名曰王要折夫錢也
俄而添折馬數百匹曰王要折馬錢也俄而添折船二
十四隻曰王要折船錢也俄而添折膳品二千餘兩曰
王要折膳錢也俄而添折廩糧三十八分曰王要折廩
錢也以分封爲奇貨以金錢爲性命以殺人爲兒戲以
矯令爲尋常不惟目中無福王亦且目中無 皇上
矣萬一此輩得志羣宦轉相效尤養成驕橫難制之性
必且流毒縉紳必且傾危社稷近之振瑾接迹於輦轂
遠之節甫聯袂於宮闈其爲國家之害有非臣子所忍
言者矣嗟嗟此輩勢割而體虧其氣不完其性愈狠百

計攫擊吞噬雖小民肝腦塗地而眉容不少蹙眞如縱
十虎豹豺狼於郊原噴目礪齒食人方甘而臣以一身
輕撩其鬚臣之愚也爲民受辱臣實甘之爲國伸法斷
在皇上查得先年禮部侍郎敖文禎曾以剛介被宦官
辱罵蒙我皇上立賜重處天下莫不服皇上之英斷臣
以執法招侮不幸類是而宦官貪橫過之伏願皇上無
分宮府大加鈇鉞將樊用李朝雲檻車拏回追究沿途
狼藉賊私仍明正欺王矯令蠹國殃民之罪肆諸市朝
庶祖宗之法可伸貂璫之禍可杜非僅僅爲臣一身惜
體統也臣不自揣力輒忤近倖更望行罷斥以謝宦官
臣不勝隕越待命之至

諭祭王莊毅公文

崇禎二年九月十五日

祭曰惟卿天資介直學力淵泓操觚而藝絕儒林振翮
而名蜚甲第池州司理口碑載明充之稱蘭署分猷寰
宇洽敦庸之化抗章國本皎然貫曰丹誠礪節皇華貞
爾凌霜雅操中州典試桃李成蹊三輔撫循羣梟解而
歸鴻雲集兩淮督運妖寇殄而河伯效靈剪狐假于方
張矢鳳鳴于寡和晉大司徒改大司寇秉正不移伸三
寃戚抑一穢勲頽波獨砥去國身輕似葉昌言望重如
山惟爾夢叶乎皋陶旣也德符于邁種胡天不憖奪我

典型追撫忠魂良深憫恤仍嘉爾配賢淑相成先爾云
亡并茲賜祭靈其不昧尙克同歆

王莊毅公傳

明 史

莊毅公王紀字惟理芮城人萬曆十七年進士授池州
推官入爲祠祭主事歷儀制郎中秉禮持正時望蔚然
二十九年帝將冊立東宮數遷延不絕紀抗疏極論其
冬禮成擢光祿少卿引疾去四十一年自太常少卿擢
右僉都御史巡撫保定諸府連歲水旱紀設法救荒甚
備稅監張鬻請征恩詔已蠲諸稅紀再疏力爭鬻竟取
中旨行之紀劾鬻抗違詔書沮格成命皆不報居四年

部內大治遷戶部左侍郎總督漕運兼巡撫鳳陽諸府
歲大凶賑救如畿輔光宗立召拜戶部尙書督倉場天
啟二年代黃克纘爲刑部尙書時方會議紅丸事紀偕
侍郎楊東明署議言方從哲知有貴妃不知有君父李
可灼進藥駕崩反慰以恩諭賚之銀幣國典安在不逮
可灼無以服天下不逮崔文昇無以服可灼不削奪從
哲官階祿廕無以洩天地神人之憤議出羣情甚竦主
事徐大化者素無賴日走魏忠賢門構陷善類又顯劾
給事中周朝瑞惠世揚紀憤甚劾大化溺職狀因言大
化誠爲朝廷繫賊則大臣中有交結權璫誅鋤正士如

宋蔡京者何不登彈文而與正人日尋水火其言大臣指大學士沈滄也大化由此罷去而滄及忠賢深憾之御史楊維垣與大化有連且素附滄遂助滄詆紀言紀所劾大臣無主名請令指實紀遂直攻滄言滄與京生不同時而事實相類其結納魏忠賢與京之契合童貫同也乞哀董羽宸與京之懇款陳瓘同也要盟死友邵輔忠孫杰與京之固結吳居厚同也逐顧命元臣劉一燦周嘉謨與安置呂大防蘇軾同也斥逐言官江秉謙熊德陽侯震暘與貶謫安常民任伯雨同也至于賄結婦寺竊弄威權中旨頻傳而上不悟朝柄陰握而下不知此又京迷國罔上百世合符者客魏聞之怒爲滄泣愬帝前帝謂紀煩言加譙責焉初李維翰熊廷弼王化貞下吏紀皆置之重辟而與都御史大理卿上廷弼化貞爰書微露兩人有可矜狀而言不測特恩非法官所敢輕議有千總杜茂者齎登萊巡撫陶朗先千金行募兵金盡而兵未募不敢歸返薊州僧舍爲邏者所獲詞連佟卜年卜年遼陽人舉進士歷知南皮河間遷夔州同知未行經畧廷弼薦爲萊州監車僉事邏者擄掠茂言嘗客于卜年河間署中三月與言謀叛因挾其二僕往通李永芳行邊尙書張鶴鳴以聞鶴鳴故與廷弼有

隙欲藉卜年以甚其罪朝士皆知卜年冤莫敢言及鎮撫既成獄移刑部紀疑之以問諸曹郎員外郎顧大章曰茂既與二僕往來三千里乃拷訊垂斃終不知二僕姓名其誣服何疑卜年雖非閒諜終實佟養真族子流三千里可也紀議從之邏者又獲奸細劉一巘忠賢疑劉一燦昆弟欲立誅一巘與卜年因一巘以株連一燦紀皆執不可漼遂劾紀護廷弼緩卜年等獄爲二大罪帝責其陳狀遂斥爲民紀既斥大學士葉向高何宗彥史繼偕論救皆不聽後閹黨羅織善類紀先卒乃免崇禎元年復官贈少保廕一子諡莊毅

芮城縣續志

卷四

藝文上

十

寄鄒南皋啟

王紀

曩小啟二函托南雁奉候起居諒不作石頭浮沉然而暮雨春樹之思比前更爲倍切耳我翁仁文會中聚徒講學剖精挾秘更拈出明明一語以爲宗旨此孔孟正脈也陸子靜以後無此見解或曰此與陽明良知之說似歧而二之不知此正不相妨也明德卽良知明明德卽致良知是一而二二而一者也但云卽德卽止卽知卽明僮侗渾說不幾與朱註少異乎雖然承絕學之緒須是大開眼睛發先賢所未發覺斯人所未覺期於明道又安諭其詞之異同也獨不見孟子興乎孔子平日

只說個知言子輿便益之以養浩然之氣似初立門戶
話頭實乃獨探本原闡抉幽秘與聖經相表裏者也微
獨此也如周子之太極圖開口便說無極而太極張子
之正蒙開口便說太和所謂道何嘗傍人口吻而言道
統者必歸之由斯以譚迺知性命之理至易至簡亦至
精至微天地不能自言而言之於聖人前聖人不能盡
發而發之於後聖固詞說之所不能殫而終古之所不
能窮也不然言道如義文孔孟可謂發揮精密無餘矣
萬一百世而下天下又生一義文孔孟安知爻象之外
更無爻象語孟之外更無語孟謂朱註爲千古絕響可

乎何獨於卽德卽止卽知卽明之語而疑之打破舊窠
臼別闢一乾坤我翁已 然具千古隻眼矣雖謂爲朱
子之益友可也弟平生好讀書諸子百家頗多涉獵卽
天竺柱下漆園諸編亦曾寓目豈曰玩物喪志正欲多
識前言往行以蓄其德庶可漸窺周程張朱之脈終或
不至枉過一生也然而強探力索精神獨苦畢竟了無
所得如今捲慮靜坐默默體認天理少倦散步逍遙小
園見花香鳥語莫非良知現前而胸次一旦豁然有鳶
飛魚躍之意遂不覺手舞足蹈而不自知也翁以淑世
覺人爲己任倘以孺子爲可教而諄諄指開我矇矓余

雖不敏不敢不忻然奉爲蒼蔡矣寥寥尺一寫我求教至情尋常寒溫之語絕口不復道也

刻劉鳳川先生文集序

明 任養心

鳳川先生余邑人也自爲諸生時已博學好爲古文辭弱冠舉明經嫺習當世務顧公車數上竟不第選揚州別駕負氣豪宕絕不爲脂韋態遂調平涼先生曰吾豈以轆軻而遽易初志哉蓋挺然不撓視時輩紛華躁競無一當意者居數年自分骯髒不偕於世輒拂衣去隱於中條之陽留情翰墨托志烟霞意甚適也前後著作若干卷先生卽世垂三十餘年厥嗣學博子亡手遺文

一帙屬余曰此予先人存笥稿也不肖力不能梓恐手澤堙滅心甚悲之古人尚友先自其鄉門下獨無意乎余受而讀之詩導性情而用意深婉文述名實而敘事簡嚴殆蔚然一家言也昔韓昌黎謂物不得其平則鳴以先生之才而偃蹇若此其真有不平者耶太史公文疎宕而氣奇人猶謂其資遊歷而長先生轍跡徧燕趙兩淮三秦之墟諸國俗民風名山大澤皆寓於目而盪於心故以其沉鬱之思寥廓之興寄之詩文以發其憫時憤俗之意何其慷慨激昂如其人哉若夫居官居鄉大節凜凜是又非文辭所能槩矣余嘗慨夫世之躋膺

冒榮未久而泯泯者何限惟著作之士千百世以下猶稱焉先生抱道懷奇厥施未竟僅僅垂空文以自見乃其所不朽者固在此而不在彼也因稍爲銓次捐貲付劄劂氏且綴數語簡端云萬曆庚寅冬十一月

李子攀義墳記

薛一鶚

余邑人李子攀儻直好義薄有資財居城之東關念孤貧及僑寓者物故無葬地卽欲買葬地復無以償乃或棄置若草殞路左右邑居之民最夥而附郭葬地尤難得切憐之乃于城東三里許買地一區計四畝承賦役于其身舍爲墳令無地以葬者葬閒無棺者代爲具時

偵察之以禁樵牧者埋石四隅防侵毀中立碑曰義墳誌久遠也衆欲記以文謁余余曰宜記此義舉也可以佐王政可以勸淳風可以祛時沴宜記夫古聖人掩骼埋胔澤及枯骨此得之目見者耳其不能見者良多也豈其心之所忍哉國家子育萬方合靈蠢動植之物悉欲置之得所養孤老以養濟院賑貧以社倉療病以惠民局食死者以漏澤壇天地父母之心至切矣而民或無地以葬則勢之所不能徧及也此舉有以佐國家所不及矣故曰可以佐王政夫民吾同胞凡天下之疲癯殘疾鰥寡孤獨皆吾兄弟之顛連而無告者也世人以

嗜慾迷其眞競刀錐之利而相戕相陷擠于溝壑不之恤骨肉中且有然者況于人乎省此可以大同仁之量啟萬物一體之心矣昔子產敘伯有之死者而殯之子皮曰夫子禮於死者況生者乎此之謂也故曰可以勸淳風後周賀蘭祥爲荊州刺史境內旱見發塚露骸者多收葬之卽日澍雨降故大軍之後必有凶年蓋體魄不安則其氣愁怨悲憤或致螟蝗癘疫旱魃之災若生死得所斯靈妥而氣和以和召和天地之和應之矣天人相感之理詎可以爲無哉故曰可以祛時沴茲一舉而有三益焉宜諸君之嘉尙而欲垂之遠也李子輯祠

芮城縣續志

卷四

藝文上

十四

宇修齋醮其施財之事甚多不悉記以此爲義舉也特記之

重修文學書院記

國朝

王用明

芮邑東距城五里許舊有文學書院前瞰大河後負條山相傳魏文侯師事子夏授室國中卽此地後之人追崇故事創立祠宇以祀之因名曰文學書院卽昔之講壇也凡其締造有原增修有典表彰有詞罔不著之於石班班可考焉夫由今日以上溯春秋數千餘年矣魯論所載雖卜氏子言行具在而傳經之學所以立法教人者今已概不可考然而風俗之淳樸依然篤實遺意

也人才之振興猶是文學雅化也向非流風餘韻入人者深而傳世者永曷克臻此間考名山大川中高臺巨閣繡闥雕甍古蹟不乏乃未幾而就湮沒者不可勝數徒令人憑弔於荒烟蔓草間而不勝歔歔文學書院以先賢講學之地存其遺址構堂而奠固非有天外連雲地上湧金之傑構也而馨香俎豆數千載相延如昨日非以有關於風化人心者篤且諒哉然則士君子立身制行所以法天下傳後世以致雖沒不朽愈遠而彌彰者固在此而不在彼也余自辛卯冬承乏茲土下車伊始卽擬拜謁先賢祠追尋遺範以志嚮往而案牘鞅掌

不果今歲秋有楊生者經理書院事見其棟宇傾圯漸就荒蕪爰以祀田數十餘畝之蓄積補葺周當工方竣懇記於余乃卜日而往祭焉見其堂宇峻整煥然如新古柏環堦蔚然深秀余心竊喜以爲旣獲登先賢之堂恍如親當年之警欬而又嘉諸生之克勤克慎果能無負斯任也爰撮其梗概並閒附己意以誌高山之仰乾隆三十八年三月旣望

重修西河書院碑記

李承堦

癸丑秋予蒞芮暫舍西河書院詢厥由來緣先賢卜子夏授教其地以名之自古及今建學立師所以敦崇文

學而既其實者其法良其意美也董子之興學置師以養天下之士明道程子所謂擇師之善者以分教天下之學自藩府迄郡縣拔士之願學民之俊秀者入焉咸優其廩給而蠲其身役夫郡縣之學守令得董其教事而家塾黨庠有所未逮爲民父母欲子弟乎民之秀良而無力於學者不悉使麗諸郡縣之學以資其益烏覩所謂既其實哉我

朝文治日隆教澤日廣無大都小邑皆得立書院而上其考成教之通乎古者備矣特慮行之者徒有其迹問書院之屋宇則寥落空存也問肄業之子弟則出入不

計也他如修脯膏火之類更多缺畧循其名而不核其實亦守土者羞也西河書院創始於前任莫君於今數十餘年矣墻垣剝蝕簷瓦頽隳漸就圯廢前令孟君感慨係之欲謀新而無由歲壬子縣治東曲裏村有無糧灘地近民爭訟不己公毅然曰此書院復新之機也遂庭斷入官計地一千七百畝畝定租銀七分本年收租銀一百一十兩擇紳士數人經理修葺又因生童膏火不足卽以歲入地租酌增之行看爲善有資邑人士說禮樂而敦詩書風氣蒸蒸日上蓋有實心自有實效矣予旣治芮之明年邑紳士謁見云孟君囑修書院計短

數百金求予協力以葺厥事予曰孟君已雅意作人於前予敢不落成於後爰捐廉俸扶其傾欹正其頽謝加以丹雘暨塗不日告竣紳士乞予文誌之且述孟君之言曰充入灘地本爲書院補修膏火之費但地濱河流其久暫原無定局故未敢舉以上聞不過一時事所得爲者力爲之以旣其實焉爾噫嘻是蓋與余有同心矣抑又聞之魏俗素樸士尙行儉猶守先賢篤實之遺教考昔三至五起之論其載在記傳者若何經濟則以知今日之更新而尤足信夫講學之士之大可以有爲也是爲記乾隆六十年五月日

重修城隍廟碑記

林芬

蓋聞三王異世不相襲禮祭祀之禮歷代制各不同國朝之制州縣所祀者壇有四廟有五顧四壇每歲祭祀各有其時而五廟則春秋兩祭外每月朔望守令必躬詣行香以時修葺斯固守土者之責也余蒞芮十五年諸壇廟咸經修理獨城隍廟去重修時頗遠殿寢廊廡類多頽廢不足以崇享祀而肅觀瞻心竊憂之欲興修而力絀不能獨肩其任然寢食未嘗忘也戊子五月南關士民呈請興修推樂善之心思與梓里同之余喜其實獲我心因捐廉俸爲邑人倡飭三廂四都鄉約

令勸遐邇好善者量力輸貲不數月而得金若干亦足以見人之好善有同心矣於是庀村鳩工由神像殿寢廊廡以至香亭獻殿樂樓山門照牆無不煥然而新至己丑七月功竣以今視昔豈猶不足以肅觀瞻而崇享祀耶伏念余於嘉慶甲戌春二月蒞芮彼時緣癸酉歲荒歉雨澤愆期而麥根又未安穩人心惶惶余甫履任憂慮不知所措中夜起立默禱於神旋得大雪繼以膏雨應時麥遂豐收民食因賴以濟且余每遇春秋祭祀朔望行香心誠必信而於城隍神前尤加敬畏凡百姓之疾苦年歲之豐歉雨暘之調否見則必告告則

必悚惶懇切如神臨之在上者誠以德薄才淺民社任重而城隍神幽贊造化實與守土之官分治斯民者也庶幾仰承默佑使歲豐民樂老幼恬熙守土者得以寡過皆神之惠朝夕自盟此心十五年如一日而果無歲不收民無餒者非神力默爲佑庇曷克臻此飲水思源固宜答報今茲之役未可以云報然而余與士民之心俱妥矣夫人妥矣而謂神弗妥乎雖然作善降祥不善降殃其理昭然不爽神好佑庇要佑庇不善之人也願吾民推斯役作善之心達之於父子兄弟朋友族黨之間使之無事不善焉有不獲福者

而如其不孝不弟不睦不和甚至奸邪兇險傾人利己
明有王法幽有鬼神縱使在世鑄張爲幻能逃三尺試
看兩廊地獄爲何人設耶可不惕然猛省去不善以歸
於善耶余今已引疾將去芮然與芮之人不能愬然也
夫人相處久則不忍離人之情也余蒞芮不爲不久矣
能無一言爲我芮人告乎 神福善者也以善自勉
神其福之道光九年己丑桂月日

增修關帝廟碑記

毛鳳儀

昔孟子論浩然之氣曰至大至剛以直養而無害則塞
於天地之間文文山正氣歌曰是氣所磅礴凜烈萬古

存從來宇內完人其神不與形而俱盡者皆此氣真積
於中推而至於顛沛存亡之際倉卒嫌微之間一念精
誠無不貫金石而昭日月伏惟 帝君浩然正氣常存於
宇宙洵所謂上下與天地同流矣 帝生於漢未值衰
亂扶正統生平大節英風炳憐史冊論者稱其忠義而
未嘗推原其所本竊意當時豪傑英雄挾其才力智術
以爭雄一世者蜂起林立由今思之無論功名利祿者
流雪消冰釋泯其跡於荒烟蔓草中而不可知卽效命
疆場身殲帷幄之士亦各視其境之所歷澤之所被而
後祀典從之而 帝獨往來於數千百年間上自 朝

廷名公卿下及村野愚夫婦近而僻壤窮鄉遠而要荒
侯甸莫不奉俎豆而薦馨香非浩然正氣實有以貫注
於億萬人心也哉然則其所本者從可識矣芮屬解
梁爲 帝梓里邑人之奉祀尤虔城內東北隅有廟創
自元至正年間嗣後修建屢屢歲時罔懈道光庚寅秋
首事人謀重修之邑紳薛積成薛洪先慨然出數千金
又勸募城鄉得金若干閱二十一月而工畢規模宏敞
廟貌尊嚴棲神斯稱愈以見 帝之感人者千萬年如
一日也廟在中條之陽遙望山勢巍巍俯黃流而駕大
行其磅礴鬱結之氣終古不易而光景常新自足與天
日

書院興修碑記

符壯圖

芮邑西河書院之設由來舊矣其間屢興屢廢則未能
經畫久遠故無實而僅有其名歲己亥山左王福巖前
尹來蒞茲土雅意培才毅然以興復爲己任得黃春圃
少尉於中贊襄招邑紳郭順命薛銘盤薛洪先始終經
理同力督修越三月堂室聿新卽延主講爲多士楷模
文風爲之一振第核其經費歲入僅田租一歛尙不足

三百金膏火關如殊阻寒士進取之志仍非所以廣教
育勵人才也復邀邑人爲集腋之謀乃事未就緒移任
深川庚子夏余承乏於斯聞風起慕亟思所以踵成之
爰於辛丑春仲與黃少尉並郭順命則前之經理人也
薛銘盤薛洪先則前之經理而今之監院人也又邀學
宮王耀辰王夢元李光斗王廷照張黃裳爲首事統議
多招紳士面勸捐輸余首出俸百金爲之倡各紳士亦
慷慨解囊共得一千二百餘金不勝喜悅又囑經理及
監院首事諸人廣爲勸導不數月續得一千六百餘金
前後綜計得金二千八百兩有奇除添蓋房屋補置器

具與一切雜費外以二千四百兩發閭邑典肆按月七
釐生息終歲可得二百金益以舊有田租畧近五百之
數廼立膏火並卽原定獎賞酌量加豐以深鼓勵之思
而肄業多士果能互相觀摩無負前尹雅意壬寅科試
食廩餼者一人遊鬻序者凡六人焉從茲以往有興無
廢其有望於後來繼持之者豈淺鮮哉至於書院章程
另碑刊列其捐輸各姓名鏤之碑陰以期不沒人善云
道光癸卯十一月日

重修文廟碑記

何玉端

文廟之設自漢唐以及元明至於今弗替芮雖僻處山

隙立廟以薦馨香與通都大邑無異廟舊在縣治東南隅金天會八年朱洗馬移建今所明正統時知縣孟濟廓而大之至我

朝屢經修葺俱有碑記可考但歷年久遠梁棟剝落墻

垣頽甚非尊崇先師意也余以道光丁未承乏茲

邑甫下車卽行謁廟覩摧牘之狀未嘗不心焉憫之奈

年不順成比戶空乏雖欲修葺興舉殊難竊有志而未

逮至咸豐壬子豐年則告屢矣民則已阜矣仲春行

釋奠禮廣文茹君麗植與余商議修理慨允捐俸銀四

十兩以爲倡余欣然曰此其時矣爰舉首事者經理之

芮城縣續志

卷四

藝文上

二十二

又諭捐輸者襄助之共得二千餘金迺鳩工庀材擇日興功大成殿兩廡皆重修焉翻建戟門砌以磚墻名宦鄉賢忠孝諸祠昔皆南向堪輿家以非朝拱遂移置東西向且爲建一官廳櫺星門泮沼亦補修之又創建黌門制度始備照墻比前高廣牌坊對峙東義路西禮門繚垣周遭下磚上瓦文昌祠崇聖祠一併修之敬一亭明倫堂學署齋房亦整理焉余以癸丑攝篆介休不克親見其成抱憾良多歲甲寅因公復至首事諸人來謁曰文廟之修公爲經始今將落成勒貞珉以示久遠請誌以文余不獲辭遂縷述其巔末而爲之記咸豐六年

丙辰三月日

西河書續置房地碑記

丁樹勳

記有之君子如欲化民成俗其必由學郡縣書院之設
上體

國家興賢之意下爲閭閻育材之方端本善則甚盛舉
也芮本古魏地先賢卜子設教於此魏文侯以禮師
之當時若段干木田子房輩相與切磋砥礪以崇其德
蓋彬彬乎文學之盛軌也後之人景行前徽創立書院
特取西河以爲名亦謂仰止高山取則不遠因流溯源
庶可知所嚮往爾然而儒有君子亦有小人旌淑別慝

芮城縣續志

卷四

藝文上

二十三

辨之宜早儻使蘭艾不殊玉石相混毋亦適越而北其
轅乎夫十室之邑必有忠信山川毓秀何地無才裁成
化導在乎樹之的而早端其趨故考課之有獎賞非示
之以利也所以覈真僞考德業務使篤信謹守景前徽
以共勉爲君子之歸蓋先欲覘其器識而文藝其後焉
者也聞書院膏火獎賞之需舊本敷用嗣因典肆多歇
業遂致支絀歲癸丑前尹何君准齋長薛于瑛等稟請
將從前發商生息銀置買田房收租息爲修理獎賞之
費其所以謀久遠者意甚善丁巳歲余蒞茲土齋長王
治泰等呈契立案並請添首事王夢奎薛洪先張學傳

張黃裳經理其事以期有舉莫廢並乞余言以勒石余復何言哉余念諸生幸居文學之邦獲親賢師友之訓尤宜經明行修學優而仕其無負西河氏遺教與聖朝作人之雅化而移風易俗之道卽基諸此可不勉與咸豐八年歲次戊午仲秋之吉房地畝數載碑陰

修芮城縣志序

丁樹勳

古者太史陳詩以觀民風今薄海一家凡郡邑所以紀故實昭來茲足備輶軒之採者志是己昔蕭何入關中先收圖籍晦翁至南康卽求志書非以志之所繫綦重哉余以丁巳夏奉

命宰芮芮雖蕞爾邑然登條山之巔俯瞰黃河見諸峰雄峙巨浪奔流枕山帶河洵全晉之屏藩也且民俗近古虞夏之遺風猶存瞻閒田望魏城段干有廬睢陽有墓都人士果能景仰前徽何患不聞風而興起嘗於公餘展志書閱之始纂自前明嘉靖時別駕劉君繼修於隆慶癸酉鳳翔李尹與僉憲薛君再修於國朝康熙壬子淄川畢尹迨乾隆癸未廣川莫尹莅芮承州守言公命修邑志考覈精當編次更井井有條但迄今又幾及百年矣其間如歷任文武職官邑中科甲歲薦仕宦封廕及藝文之有關係者今尙難悉其詳至若孝義節烈

足以扶世教而挽風化屬在編戶無力請 旌者更多湮
沒不彰倘遲之又久後卽有心殷補輯者文獻無徵不
徒深浩歎耶爰不揣固陋力搜各房舊卷移查鬻案旁
稽碑文廣詢輿論仍原志所載於篇首而以近事續入
之不敢妄有所更易紀實也用捐廉俸刊刻成書繼自
今官斯邑者得以按籍而考政生斯士者得以尙論而
景行將見吏治由今以追古民心革薄而從忠於以黼
黻

皇猷昭一道同風之盛軌則是書非采風者所樂得而觀之
哉余以志切歸養竊願目擊告成未免有不備不醅之

芮城縣續志

卷四

藝文上

二十五

憾尙冀後之君子曲鑒私衷更正之續增之悉臻完善
以爲異世考鏡之資是尤余之所厚幸也夫

重修風伯雨師廟記

賀寅炳

國家定制風雲雷雨之神各邑皆有專壇歲時享祀維
謹事關生民鉅典也而芮於古魏城之東數十步外復
立風雨廟每歲仲春二日邑大夫必潔誠致祭於廟爲
民祈澤 神亦頗著靈驗夫箕爲風伯畢爲雨師歲之
豐歉於是乎在象而祀之固其宜矣第芮有是廟而他
邑或不概見舊誌載自有斯廟以來二千餘年蓋昔之
賢侯所立以禱水旱者傳曰有其舉之莫敢廢也故相

沿至今而爲典其說蓋不爲無因矣余嘗登覽其境見

其地勢高曠四望可周遠近居民墟落樹木葱鬱烟靄

蒼茫環而繞之如星拱辰洵棲神之福地也而實隸

澗西村莊

三村之中則三村之隨時葺理斯廟也固宜溯自

嘉慶庚午重修後幾五十年廟貌漸就荒頽而村眾弛

易鬪差訖無成議語曰民不和神不享神所憑依將在

民矣如是而求神之降鑒不可得也今歲春柴村州同

宋之儒澗西中莊某某等糾合村眾同心協力督興斯

役並定爲永世和睦無廢神祀之規凡五越月會方

憂旱三村耆老虔誠致禱於神卜所以取雨者兆曰

芮城縣續志

卷四

藝文上

二十六

老泉吉老泉水深而多魚蝦於是執香率眾詣泉取水

歸方立壇濃雲四起及夜甘霖沛降溝澮皆盈比曉視

之么蝦葉魚漂浮無數村眾皆詫爲異不知不如是不

足以顯神之奇靈而徵其水升於老泉則信乎民和

而神降之福也廟工亦適於時而告竣村人求記其事

並述其感應之奇如是因次其巔末俾後之人永遵成

憲以無墮古賢侯之勝蹟而並善和睦鄉鄰之俗則神

之惠澤邑人當更無涯涘也是爲記咸豐八年孟冬月

日

學諭示書院諸生

賀寅炳

及門某子某子等既以博士弟子報 邑侯謹選吉日將率謁先師行舍菜禮入庠矣親好皆置酒爲賀諸子衣裳楚楚虹氣渥顏相與酬酢爲歡飛觥往來興猶未暢賀子曰僕實不喜飲然竊有所聞可解頤忘醉請述之以爲諸君勸可乎眾皆曰唯唯願在下風賀子曰僕顛軫之鄙人也其鄉率農家者流何所聞然農之中有兩人焉其一人家置木困一以吾鄉斗二十八筒計之困可容五百石每歲計畝所入或虧三五分二三分不等而恆不足實其困主人於是愀然色鬱自咎其穡之不力也順天之時盡地之利早作暮息督率子弟畢其

力而無敢懈出門見糞土視若珍寶時或着新衣仍兩手掬撥入襟中不爲穢蓋欲然者嘗見其困之未實也不知其衣之新也其一人家置大荆筐一充之可容五斗有餘每歲計畝所入筐恆不能勝於是爲甌爲甗爲罌爲甔極而至於盎缶槃盂皆粟所充溢而家無虛器焉主人則神飛色舞侈然自多其穡之獨善或有貧乏不給乞貸監河者彼則揚揚然曰人生食能有幾何嘗苦不足若此新穀一登袖手優游傲然自足諸君請參此兩人將以困未實者爲足乎以筐不勝者爲足乎以自謂不足者爲力穡乎以自謂足者爲力穡乎諸子方

靜聽沉思未有以對一客曰困未實者爲足筐何足也
一客曰筐不勝者爲足困固不足也賀子未及與辨一
客則穆然思蹙然縮頸而咋舌曰嘻我知之矣先生詭
言之是所謂器大者常虛而器小者易盈也夫爲學之
道何以異是賀子曰請卽以此酬諸子酒

文學寶興序

雲茂濟

芮邑古魏地背山面河距晉垣最遠民情褊嗇有古遺
風邑治之東偏則卜子夏授詩處也近世以來士人以
讀書起家者蓋鮮^余下車伊始延見諸父老訪問鄉閭
風俗其民類多務農力作工賈次之士更次之及考閱

月課士之負質瓌異能自拔於流俗者固不乏人又何
志趣之卑而發跡者不數覲歟詢悉所由皆以寒羶坐
困艱於資斧爲言以故童試僅三百人甫掇一芹則以
距省窵遠輒自驚於館穀而無蘄進志矣卽幸鄉闈報
捷而公車又艱北上抱瑾握瑜之士亦撻舌裹足而莫
可如何豈其民俗儉嗇之過而不知相賙恤歟抑何文
教之不興也^余欲於三年大比中興其賢者能者而欣
助之而苦於力有未建自捐三百緡爲之勑邑之急公
慕義者皆能力踵其後乃延薛君天相王君振鐸專司
其事五閱月而告成總計白金三千兩發商生息凡川

塗之費獎勵之資皆於是乎賴顏曰文學從卜子之教也夫難變者習也難遇者時也始_余之初是議旁觀者皆有難色謂其將囿於習也而顧聞風響應大挽夫褊嗇之遺豈非丕變者機耶士之生茲士者吾知必乘時而起彬彬濟濟以導揚夫文明之盛將卜子之教復振於今茲安見習俗之能移人哉後之君子其遵守而增長之俾有志之士專意進修而無傷遠適其毋視爲利藪焉是則_余 初始之苦心也夫同治十有二年癸酉仲冬日

重修紫清觀碑記

萬啟鈞

芮城縣續志

卷四

藝文上

二十九

芮西關之北偏有紫清觀焉稽邑乘爲有唐侯真人降生飛仙臺之故址創自大宋政和五年歷元明至國朝關之人歲時享祀蓋以結粉榆之社託神靈之庇佑者非伊朝夕矣乃緣代遠年湮遂致棟傾垣裂瑤房玉宇將長莓苔紫館金臺半摧風雨諸神之靈爽莫憑廟貌之觀瞻焉肅司事者公議修葺苦力綿功浩售廟柏一株有不斲則募貲以足之余乃捐廉而爲之倡凡好善有同心者亦樂施無吝色焉於是集腋成裘鳩工庀材自 玉皇 三清 三官 眞武 關聖 土神以及 五瘟將軍 龍虎二神各神祠無不次第舉修起

甲戌之秋訖乙亥之冬向之殿宇傾圮者時則瓴甃鱗次梁棟翬飛矣向之畫彩污穢者時則柱石雲橫門軒霞蔚矣工既竣司事者問序於余余因諸人之勤勤懇懇襄此盛舉并冀神之惠我無疆也爰樂爲之序

重建文公土地廟碑記

萬啟鈞

攷之誌縣北二里古魏城南相傳有魏文侯琵琶亭故址村人因之建

土地神廟於此爲歲時賽祭之所所以祈逢年而托庇佑者恆於神利賴焉歷年滋久殿宇隳壞非民所以尊神也有司事等集眾議修擬以廟內柏樹售爲興作貲有

不勇再募化以足之於是鳩工庀材築土成基構木爲厦不日楹排雕楚梁亘修虹蕙宇堅完丹青炳耀眾覩壯觀莫不嘆嘉是役也始於同治八年七月而訖於光緒五年十月總其所費之金越若干數記曰有其舉之莫敢廢也此之謂哉工既竣邑人來乞余文余不敏勉爲之記使鏤於石焉

重修鄴侯祠記

萬啟鈞

光緒六年歲在庚辰春有以謀新鄴侯祠請者余進而謂之曰善哉舉也若謀新之若亦知祠而祀之之意乎夫郡縣必祀鄴侯說者以其起自刀筆吏定法律爲萬

世準祀之以報其功固也而猶非探源之論也蓋上世民情渾噩雀角無爭自機械多而後訟獄興訟獄興而後科條設聖人於此亦藉以維持人心耳一則曰維克明允再則曰刑期無刑非甚有大不得已者乎鄭侯承無道秦之後佐漢高除苛法次律令九章以治天下平陽侯入相一主清靜無爲之旨其於古聖微意殆深有契焉者矣登其祠者其能德道禮齊而政刑不事奉公守法而鍛鍊無聞乃不失作律之心而有當立廟之意非然者雖蘋藻將誠神且不歆其祀矣而顧曰鑄金範士隆廟貌以崇享祀已哉僉曰唯唯於是捐俸倡始裒集衆資飭工庀材以襄厥事宋棟桷楹礎之殘缺者易之丹雘髹漆之漫漶者新之閱兩月而工訖將泐石以紀其事也爰引伸前說而爲之記

藝文下

望方山

選勝徵前牒方山蹟著奇湖搖千壁動雲欲萬峯移高
嶺平如掌洪流注似卮百梯誰獨住五老自相隨倚杖
天何近尋源路轉疑孤懷勞極目爽氣對支頤石鼓鳴
深洞鴛漿灌紫芝郵驂行倦矣林鶴怨淒其瑤草非難
拾桃谿會有時芙蓉秋露好合與地靈期

余於署後榛莽中得前明蒲守張峽山詩碣乃嘉
靖甲子邑宰黎陽錢公名萬選者所刻至我

朝康熙丁酉吳興錢公萬選來宰斯邑於瓦礫間得

之見名姓與已皆同跋而位置焉迄今道光辛巳
余又見其棄於地矣風雨剝蝕字跡幾不可辨認
余以硃塗而讀之喜其事閱兩朝二公姓氏官階
無不適相符合遂移置西園壁上並誌以詩

國朝
林芬

片石荒榛裏摩挲老眼驚斯人得斯碣同姓復同名異
代遭逢巧奇緣感慨生鐫詩亦常事造物太多情
一百又五載遙遙珍惜之塗硃文可讀剔蘚石堪移四
壁忽生色兩公安得知後來人似我定和草堂詩

神槐歌

并跋

林芬

神槐不朽疑有神秦耶漢耶無可名但見枝柯蟠鬱獨
奇古不知生自何代栽何人頂禿腹空根怒橫蒼皮溜
雨莓苔青有時高垂清蔭換嫩綠老態不讓桃柳新晨
昏屢閱飽風露盛夏無暑秋有聲冰霜嚴凝節益固晉
公至德開後昆婆娑當日嗟仲文誰知此樹能長生或
是靈星精天遣下視來訟庭白鶴神所使青鸞神所乘
或是中條山靈靈氣之所結或是河伯呵護九曲黃河
濱勿剪勿伐非無因不然何以矯矯特立千萬春芮州
官舍多嘉樹中竟無能與比倫堂前老槐兩階列視之
藐小如兒孫材大難用全其真斯理微妙誰具陳我作

歌兮神來聽穆穆清風吹縣門

縣署堂西有神槐誌書繪之其由來不可考名之
曰神亦不知何由而神之矣署中老槐最多而此
槐古茂奇崛與他槐異古人聽訟槐下余對之十
有二年清陰垂蔭儼然如神在左右也盤桓既久
不可無詩因作歌書於石適聞禽聲上下語於綠
雲深處神其和我耶

道光丙午秋旱祈雨步禱口占 藍辰

我來中條南路旁多枯草停輿問田夫云因秋炎燠雨
澤會愆期亢陽傷禾稻聽之惻然驚下車卽祈禱祈禱

渺不應無計遣煩惱空懷旱熯憂每飯不能飽復作祈
雨文德浴兼身澡我心如惔焚乞憐於蒼昊一牒城隍
神再叩老龍島親詣龍泉取水城隍理幽明斯民之障保老龍
豈長眠坐視青苗槁率屬昕夕祈求詞顛倒非慮倉
儲虧非要民譽好但期大有秋農田無旱澇民以食爲
天穀爲民之寶食足免鴻嗷年豐人壽考古人念民瘼
痾瘵如襁褓我持瓣香求未敢忘古道神祇如有靈滂
沱幸及早

朱呂村節婦薛李氏詩

林芬

皇清主聖民日新九州四海風化淳條南小邑古河北

芮城縣續志

卷四

藝文下

三十四

婦女亦知敦大倫我來宰斯邑偶遇恭水濱士揖我馬
前殷勤爲我陳薛家有李氏一生節孝真閭里爭說稱
完人而今苦守逾八旬其夫十九遽淹逝彼時婦年二
十有二春夫無子婦可死地下相從色應喜婦母死有
遺腹地下相從鬼應哭忍死須臾姑待之甫越五月生
一兒生兒轉慮失宗支能否成立未可知以母兼父嚴
復慈玉節金堅度歲時歲復一歲無時畢不覺兒年已
六十回思苦節心暗悲那知看兒白髮有今日天喜婦
節與婦壽兒愛春暉永春晝

詩有脫遺

喜雨散步

楊春芳

幾日陰濃雨不成
昨宵旣雨喜閒行
斷雲歸岫山山活
放眼看花處處明
林樾頻聽鳩鳥轉
田園纔息桔槔聲
錦囊收得蒼烟滿
牧笛樵歌共 太平

丁巳七月朔謁卜子講壇

丁樹勳

勝地遊常少先賢澤孔長
俗猶崇俎豆

俗以是日祀神

道本式

君王古柏連雲密
空齋望雨涼
願言資灑埽
瞻拜獨徬徨

段干木祠

西山有高人清風師百世
世情日以汙誰能爲其嗣
卓哉段干賢踰垣崇素志
豈不云己甚守道固如是
高臥

芮城縣續志

卷四

藝文下

三十五

却强秦功名竟誰似

禹蹟

丁樹勳

浩浩黃流接太空
成平萬古慶攸同
界分秦晉重關奠
疏並江淮九派通
四載寅承欽帝命
八年辛苦緬神功
禹門遺跡今猶在
陌底莘莘廟祀隆

城中望條山

用過條山有感韻

賀寅炳

浮空秀色望難攀
聳髻堆螺一帶環
爽氣當門秋在闥
嵐光繞郭翠盈關
青龍霧鎖沈幽洞
甘棗支分接遠山
更向城頭烘晚照
倦飛時有鳥知還

秋日登樓望河

和原韻

楊春芳

黃河如帶望迢迢人倚瓊樓秋正驕氣薄龍門吞二華
煙涵雁磧控中條陽侯効順風平浪魏國遺封險界潮
此日憑欄添逸興 太平清晏四時調

過條山有感

奉和原韻

王夢奎

天生險境許登攀螺髻重重積翠環官有餘閒風並采

謂捐廉修志表揚潛德

民多望歲雨相關

天旱屢設壇祈禱

三休亭豈甘

休地五老峯成不老山那似神仙爲吏隱雙鳧飛度往
仍還

修志德惠歌

楊

茗上丁君芮明府清如玉壺治有譜皮裏秋陽照妍媸

芮城縣續志

卷四

藝文下

二十六

曹倉人物論今古條山之麓涇水濱惟君貺我若飲醕
政教及民威克愛激揚有典化還淳時與良朋討經史
旁搜舊聞詢士子手披事蹟百餘年壽諸棗梨繼前美
採風問俗悉下情雅意未有如君誠孝節貞良公共事
紀載何可不明君家先德人欽羨直道今又於君見
褒詞擬錫華袞榮仙吏爲開瑯環院君此舉兮感恩多
爭光史冊不消磨琴堂餘興懷抱朗閒來應聽德惠歌

遊清涼寺

陰潤

寺憶初生處人憐再度時老僧零落盡古樹斧斤遺山
色滴空翠泉聲咽晚曦登臨多慨嘆溪口白雲垂

宿清涼寺

陰潤

懸蹬山寺宿到此每從容想像舊時路寂寥夜半鐘青
猿騰絕巘白鶴隱深松僧定月初落雲封知幾重

望條山

萬啟鈞

太行之支河之滸中條山色絕今古表聖高踪不可尋
谷口空餘烟縷縷山光頃刻幻陰晴山勢蜿蜒自仰俯
險徑欹仄少人攀淺碧濃青遙可數我欲振衣造峯巔
四望空明萬物覩天風浩蕩滌胸襟爽氣悠然撲眉宇
更願鼓盪結層雲出爲蒼生作霖雨

丁丑秋未赴鄉勘災輿中作

萬啟鈞

芮城縣續志

卷四

藝文下

三十七

茫茫宦海夢如烟涸水權符已四年民命不堪偏遇我
神功屢乞莫回天拯災計拙輸籌策濟世才疎愧俸錢
庚癸遙呼聲徹耳幾回搔首意悽然

其二

萬啟鈞

鳩形鵠面悵紛羅對此淒淒發浩歌懸特在庭民尙爾
嗷鴻遍野政如何流亡莫救瘡痍苦夢寐還添血淚多
眷念蒼生意悽惻敢忘心事付蹉跎

登九龍山

薛于瑛

我上九龍嶺矯健脚力驕幽崖射春旭天風迎面飄屣
齒不惜折但願凌紫霄行行陟絕巘神曠景廓寥俯視

見大河彷彿浮艘舫萬井散烟點千峯失岵堯蒼蒼數
株柏雲端挺孤標上有青翎鳥呶啞如見招獲此奇特
觀胡不酌瓊瑤一醉碧天府永滌人世囂

九日遊壽聖寺

薛于瑛

重陽西風裏携伴出西城紅葉半飄脫農事急晚耕迤
邐東北驚古寺鐵馬鳴草草具酒果斜陽列坐晴棟宇
多頽塌久雨墻圯傾不嫌禪林廢所憂烽燧驚廟堂自
遠略惆悵我書生尙喜歲事稔閭里緩呼庚榛苓望西
方慘愴難爲情何當猖獗洗萬里歌太平

涇渡野望

楊友時

芮城縣續志

卷四

藝文下

三十八

滾滾水東流斜陽晚渡頭世情原逐浪天地此浮漚岸
遠遲青雀沙深引白鷗嚴灘千古後幾箇着羊裘

夜度恭水

楊友時

行行遊子路詩思渺無窮犬吠深村裏蛙鳴古澗中伊
誰能采菽獨我又飄蓬萬里男兒志鴻毛遇順風

虞芮閒田

質成虞芮幾千年往事遐思倍惘然雀鼠風清今樂國
睢麟化洽古閒田儘教隙地供羊牧一任殘畦付鶴眠
路畔遺踪猶在否斜陽人立憶先賢

續志捐輸花名

劉正身

捐銀壹百伍拾兩

楊樹垣

捐銀壹百伍拾兩

張立基

捐銀壹百貳拾兩

張吉慶

捐銀壹百兩

王俊傑

捐銀柒拾兩

劉兆成

捐銀伍拾兩

王代元

捐銀肆拾兩

景仁

捐銀叁拾兩

鴻吉典

捐銀貳拾柒兩伍錢

芮城縣續志

捐輸

三十九

韓向德

捐銀貳拾兩